



P R A V I L N I K
o službenoj legitimaciji državnih službenika u Službi za reviziju finansiranja
političkih stranaka
(prečišćeni tekst)

Sarajevo, august 2011. godine

Na osnovu člana 14. stav (1) Zakona o finansiranju političkih stranaka ("Službeni glasnik BiH", br. 22/00, 102/09 i 54/10) i člana 18. Poslovnika Centralne izborne komisije Bosne i Hercegovine ("Službeni glasnik BiH", br. 50/07 i 33/09), Centralna izborna komisija Bosne i Hercegovine je na 53. sjednici održanoj dana 18.08.2011. godine utvrdila

P R A V I L N I K
o službenoj legitimaciji državnih službenika u
Službi za reviziju finansiranja političkih stranaka
(prečišćeni tekst)

Član 1.
(Primjena)

Pravilnikom o službenoj legitimaciji državnih službenika u Službi za reviziju finansiranja političkih stranaka (u daljnjem tekstu: pravilnik) utvrđuje se pravo na službenu legitimaciju, sadržaj i izgled službene legitimacije, način korištenja i izrada službene legitimacije državnih službenika u Službi za reviziju finansiranja političkih stranaka (u daljnjem tekstu: Služba za reviziju).

Član 2.
(Pravo na službenu legitimaciju)

Pravo na službenu legitimaciju u Službi za reviziju imaju državni službenici:

- a) šef Službe za reviziju,
- b) revizori i
- c) pomoćnici revizora.

Član 3.
(Sadržaj legitimacije)

(1) Identitet državnih službenika iz člana 2. ovog pravilnika utvrđuje se na osnovu službene legitimacije.

(2) Službena legitimacija je bijele boje, plastificirana, dimenzija 80 mm x 60 mm. Na prednjoj strani službene legitimacije, crnom bojom, desno od grba Bosne i Hercegovine, ispisan je tekst: "BOSNA I HERCEGOVINE", ćiriličnim pismom, a lijevo latiničnim pismom, ispod toga tekst: "CENTRALNA IZBORNA KOMISIJA", desno od grba Bosne i Hercegovine, na srpskom jeziku, a lijevo od grba Bosne i Hercegovine, na bosanskom i hrvatskom jeziku, ispod toga tekst: "Službena legitimacija", a ispod toga tekst:

"Ime i prezime _____ JMB _____ zvanje/status _____, mjesto za fotografiju dimenzije 25mmx30mm, broj službene legitimacije, mjesto i datum izdavanja, pečat Centralne izborne komisije Bosne i Hercegovine i potpis predsjednika Centralne izborne komisije Bosne i Hercegovine."

(3) Na poleđini službene legitimacije ispisan je tekst: "Nosilac ove iskaznice ovlašten je u okviru svojih nadležnosti utvrđenih Zakonom o finansiranju političkih stranaka da nesmetano pristupa poslovnim prostorijama političkih stranaka ili objektima koje iste koriste prilikom svog djelovanja i da ostvaruje uvid u poslovnu dokumentaciju, evidencije i sl."

Član 4.
(Korištenje legitimacije)

(1) Osobe koje imaju pravo na službenu legitimaciju su dužne da legitimaciju koriste u skladu sa dužnošću i ovlaštenjima utvrđenim Zakonom o finansiranju političkih stranaka i općim aktima Centralne izborne komisije Bosne i Hercegovine.

(2) Zaposlenik u Službi za reviziju, kao identifikacionu legitimaciju, koristit će akreditaciju Sekretarijata Centralne izborne komisije Bosne i Hercegovine.

Član 5.
(Povreda dužnosti)

Korištenje službene legitimacije suprotno odredbi člana 4. stav (1) ovog pravilnika od strane državnih službenika iz člana 2. ovog pravilnika, predstavlja težu povredu radne obaveze.

Član 6.
(Zamjenjena legitimacija)

(1) U slučaju gubitka ili znatnijeg oštećenja službene legitimacije, državni službenik iz člana 2. ovog pravilnika je dužan u roku od tri dana sačiniti detaljan pisani izvještaj o okolnostima pod kojim se to dogodilo, radi izdavanja nove legitimacije.

(2) Nova legitimacija će se izdati ukoliko su nastupile promjene ličnog identiteta državnog službenika iz člana 2. ovog pravilnika, bitne sa aspekta mogućnosti njegove identifikacije.

Član 7.
(Povrat legitimacije)

Državni službenik iz člana 2. ovog pravilnika koji po bilo kojem osnovu izgubi status državnog službenika u Službi za reviziju, dužan je odmah, a najkasnije u roku od sedam dana od dana gubitka tog statusa, vratiti legitimaciju.

Član 8.
(Evidencija)

(1) O izdatim i zamjenjenim službenim legitimacijama vodi se evidencija u elektronskom obliku.

(2) Evidencija iz stava (1) ovog člana vodi se u Službi za reviziju i sadrži:

Red. br.	Ime	Prezime	Zvanje/Status	Broj legitimacije	Datum izdavanja	Datum vraćanja	Primjedba
----------	-----	---------	---------------	-------------------	-----------------	----------------	-----------

Član 9.
(Izrada službenih legitimacija)

Izrada službenih legitimacija izvršit će se najkasnije u roku od osam dana od dana stupanja na snagu ovog pravilnika.

Član 10.
(Propisi obuhvaćeni ovim pravilnikom)

Prečišćeni tekst Pravilnika o službenoj legitimaciji državnih službenika u Službi za reviziju finansiranja političkih stranaka obuhvata Pravilnik o službenoj legitimaciji državnih službenika u Službi za reviziju finansijskog poslovanja u Centralnoj izbornoj komisiji Bosne i Hercegovine ("Službeni glasnik BiH", broj 25/08) i Pravilnik o izmjenama i dopunama Pravilnika o službenoj legitimaciji državnih službenika u Službi za reviziju finansijskog poslovanja u Centralnoj izbornoj komisiji Bosne i Hercegovine broj: 07-2-02-2-1003-1/11 od 18.08.2011. godine.

Član 11.
(Objava ovog pravilnika)

Ovaj prečišćeni tekst pravilnika bit će objavljen u "Službenom glasniku BiH" i web stranici Centralne izborne komisije BiH www.izbori.ba.

Broj: 07-2-02-2-1003-2/11
Sarajevo, 18.08.2011. godine

Predsjednica

